



Selasa, 30 April 2024
Ogen: Lukas 2:1-7



"Mupus"



Sekalok diberu si nggo erjabu, tentuna i bas kegeluhen perjabunna ngarapken mupus anak dilaki bage pe anak diberu. Janah megati pe si begi bas kerja nereh-empo, maka pedah si isehken kalimbubu e me gelah si erjabu e mupus anak dilaki si nangkih mayang ras mupus anak diberu si nutu cimpa; bage me arapen keluarga nandangi jabu si mbaru. Dikune nggo ndekah erjabu janah lenga ndatken tuah, iusahaken me ertambar subuk secara medis bage pe i urut, gelahna keluarga e ndatken pupus. Bage me belinna arapen keluarga gelah si erjabu e ndatken pupus i tengah-tengah kegeluhenna.

Mupus entahna ndatken tuah e me sada perkuah ate si rehna i bas Dibata nari nandangi sada keluarga. Janah labo ka kerina pasangan perbulangen ras ndehara ngaloken tuah/pupus. Lit ka nge pasangan e nggo ndekah erjabu lenga ndatken pupus arah Dibata nari. Penungkunen man banta: apakah pasangan si lenga ndatken pupus la i pasu-pasu Tuhan? Tentu lang. Sabap kerinana nge keluarga si enggo tumbuk i bas jabu ngaloken pasu-pasu si rehna idur Dibata nari. Mupus entah la mupus e kerina peraten Dibata kap nandangi keluarga. La lit dalanna kita rate nembeh man Tuhan di kune lenga ibereNa kesempatan man banta ngaloken pupus subuk anak dilaki entah pe anak diberu.

I bas paksa pemerintahen Agustus kepala pemerintahen Roma, nuruh kerina rakyatna guna isensus. Jusuf ras Maria pe berkat ku Betlehem e me kuta kemulihenna guna isensus. Jusuf nuratken gelarna ras tunangenna Maria si enggo mehuli kulana. Paksa Jusuf ras Maria tading i Betlehem seh me paksana Maria mupus. Ipupusna me anakna sintua dilaki janah ibahanna gelarna Jesus. Anak e me jadi Juru Selamat nandangi kerina manusia.

Ngaloken pupus memang jadi arapen kerina pasangan si nggo erjabu, tetaplak i bas kiniteken aminna gia lenga ndatken pupus anak dilaki-anak diberu. Teruslah erpengarapen dingin erkemalangen man Tuhan.

"Mupus Anak dilaki-anak diberu e me anugrah"